



Terenga 2: Hōtaka 38 – homai, hoatu, waiho

E whai nei a AKO kia whitawhita mai te aroha ki te reo i roto i ō tātou kāinga, huri noa. Ko tātou ngā kaitiaki i ngā renga o taua ahi. Whoatu he wahie kei piroku. Toutoua kei poko. Kia kā tonu ai, kia kongange tonu ai mō ake tonu atu.

Hei Mahi Whakarongo

He puna manawa whenua te kaikōrero e whai ake nei. Mai, mai ko tāna mahi he whakatairanga, he whakawhānui, he whakatikatika, he whakaaweawe i te tangata kia kounga ai te reo. Anei ngā pātai hei whakautu mā koutou:

1. Ko wai mā ana hoa waihanga?
2. He aha rātou i mahi ai i taua mahi?
3. E hia tau te pakeke o ngā kupu hou i kōrero rā ia?

He Whakamārama

He tokotoru kupu ka noho hei tohutohu ki te reo Māori, engari ko te tikanga, kāore ēnei kupu e whai whiore hāngū. Ka noho ēnei kupu ki mua i te rerenga, arā hei kupu tīmata i te rerenga. Ka noho rānei i muri i te kupu 'Me' e āta mōhio ai te tangata he tohutohu kei te haere. Anei aua kupu:

Homai / Hoatu / Waiho

Hei Manatu

konā / reira

He tūwāhi ngā kupu hei manatu mā tātou i te rā nei.

Mehemea kei te kōrero koe i runga i te waea, ko te kupu 'konā' te kupu tōtika hei whakamahi māu i a koe ka tonu i te tangata e hiahiatia ana. Koia hoki te kupu hei whakamahi i te mutunga o te kōrero.

Kei **konā** a Mere?

Hei **konā**.

Kāore i te pai kia whakamahia te kupu 'reira' i tēnei horopaki. Ko te kupu 'reira' e hāngai ana ki tētehi wāhi kua kōrerohia kētia i roto i te kōrero.

I haere koe ki te hui?

I **reira** a Tame?

He pai te kupu 'konā' me te kupu 'waiho' hei kupu mō runga i tō waea hei whakaatu ki te kaiwaea mai, kāore koe i te wātea ki te whakautu i te waea.

Anei tētehi taurira:

"Tēnā koe, ko _____ tēnei. Waiho mai tō karere hei whakarongo māku, hei whakahoki rānei māku ā tōna wā. Hei konā!"

Hei Mahi

Whakahāngūhia ēnei rerenga:

1. Me waiho koe i ō hū ki waho.
2. Me hoatu i ā koutou koha ki te kaikōrero.
3. Me homai koe i tō mahi kāinga āpōpō.
4. Kaua e waiho i tō panekoti ki konā.

Whakautu:

1. Me waiho e koe i ō hū ki waho.
2. Me hoatu ā koutou koha ki te kaikōrero.
3. Me homai e koe tō mahi kāinga āpōpō.
4. Kaua e waiho tō panekoti ki konā.